



Zahldag.

Zahldag! Die Dampspeif bloßt Feierowend,
Un Feierowend macht's ganze Werk
Die Schornschtäⁿ wie ausgebrennde Klowe
Schrecken sich kald un nichdern zu Berg;
Es eiserne Hofdhor krecht in de Fliggel
Un langsam un dann wie e Bieneschwarm
Die Arweider, frei jetzt vun Baum un Ziggel
Es Kaffeekännche un die Broddasch im Arm.

Die ähnde dhun draus ehr Geld noch mol zehle,
Ob's net zu wenig; Vorsicht iß bescht;
Die annere setzen mit Vache un Greehle
Sich wisawi in die Werdtschaft fescht.
Die Mehrzahl awer durch Schdrooße un Gasse
Die dabbe un renne hänezus,
Wo Fraa un Kinner uffs Geld schun basse,
Heit Owend gebbds Kaffee mit Quedschemuus.

So noh un noh hadd de Schwarm sich verlosse,
Nor ähner d'un schteht noch abseids vum Weg,
Als hedd er de Eßig allähⁿ gesoffe
Macht er e Gesicht, so drieb un so blääch;
Uff ähmol, als obsem erschd jetzt deht blize,
Daß er heit aah e paar Batze im Sack:
Dhut drime er in de Werdschaft siße
An de Nagel gehängt noch de Klärerpack.

Allähⁿ am e Disch! Seiⁿ Arwetsgenosse,
Die tickern un schtubben enanner aⁿ
Es hadd se noch immer gekrebbt un verdrosse,
Daß seller so schtolz un so vornehm gedahⁿ;
Un er hedds, wääß Gott, doch am wenigste neerig,
Wo jerer doch wääß, warum mern genumm,
Nor weil es de Dwermeeschder mol läärig,
Daß seiⁿ Badder so oft ihm geloff isz kumm.

So kann er in ehre Gesicht der lese,
Waß er sich vun denne hodd zu versieh;
Er loßt se als schtichle, er loßt als keese,
Schtill drinkt er seiⁿ Bier un guckt vor sich hiⁿ
Bis daß dann die Bawet, die do dhut serviere,
E sauweres Mädel vun dehämeaus,

Sich newer ihn setzt ohne viel Scheniere,
Deß brecht dann dem Faß de Borrem noch aus.

Nadierlich werd jetzt geuuzt un geschdicheld:
„For deß Herrche do iwe, do hadd se Zeit,
Unser Klärer sinn hald so fei“ net gebiggeld,
Sie gebt sich net ab mit de Beddelleit!“
Do dhut sich dem ähnde die Gall rum drehe,
Deß Mädcl kichert un schafft sich fort;
Ah“ Word gebbt’s anner un im Handumdrehe,
War e Schdreit un Radau vun de beschde Sord.

’s hadd Scherwe gebb un Schticker un Drimmer,
Die Bolizei mischd sich noch enei“,
Un ’s Enn vum Lied war hald wie immer
Wo ähner alläh“ schteht geje drei.
Wie er mit blooe Moole un Baufe
Dann annre Dags uff die Arwet will,
Do saht mr ganz kald em: „Dei“ is jetzt dort drause!“
Er schluckst un er worgst un er geht un is schdill.

Un drowe in de Werkschtadd do reiwe
Drei Arweider hämlich sich die Händ,

Sieh siehen den annere drauß sich rundreime
Un halblaut saht zu denne zwää de ähnd:
„Dem hämmer besorgt seiⁿ Schmuuse un Shtinke,
Der puscht uns nimmi in de Verdienstd;
Wo dhun mer deß Fäßje Bier dann drinke,
Wo de uns verschbroch, wannnd des Schbiel
gewinnstd?“

